

四庫全書薈要

• 乾隆御覽本

集部

東坡全集卷十

宋 蘇軾 撰

詩七十八首

九日黃樓作

去年重陽不可說
南城夜半千漚發
水穿城下作雷鳴
泥滿城頭飛雨滑
黃花白酒無人問
日暮歸來洗韉轡
豈知還復有今年
把酒對花容一呷
莫嫌酒薄紅粉陋
終勝泥中事鋤鍤
黃樓新成壁未乾
青河已落霜初殺

朝來白露如細雨南山不見千尋刹樓前便作海茫茫
樓下空聞櫓鴉軋薄寒中人老可畏熱酒澆腸氣先壓
煙消日出見漁村遠水鱗鱗山齧齧詩人猛士雜龍虎
坐客三十餘人多知名之士楚舞吳歌亂鵝鴨一杯相屬君勿辭此
境何殊泛清雪

太虛以黃樓賦見寄作詩為謝

我在黃樓上欲作黃樓詩忽得故人書中有黃樓詞黃
樓高十丈下建五丈旗楚山以為城泗水以為池我詩

無傑句萬景驕莫隨夫子獨何妙雨電散雷椎雄詞雜
今古中有屈宋姿南山多磬石清滑如流脂朱蠟為摹
刻細妙分毫釐佳處未易識當有來者知

九日次韻王鞏

我醉欲眠君罷休已教從事到青州鬢霜饒我三千丈
詩律輸君一百籌聞道郎君閉東閣且容老子上南樓
相逢不用忙歸去明日黃花蝶也愁

送頓起

客路相逢難為樂常不足臨行挽衫袖更賞折殘菊佳
人亦何念淒斷陽關曲酒闌不忍去共接一寸燭留君
終無窮歸駕不免促岱宗已在眼一往繼前躅天門四
十里夜看扶桑浴回頭望彭城大海浮一粟故人在其
下塵土相蹴蹴惟有黃樓詩千古配淇澳

頗有詩記
黃樓本末

送孫勉

昔年罷東武曾過北海縣白河翻雪浪黃土如烝麴桑
麻冠東方一熟天下賤是時累饑饉常苦盜賊變每憐

追胥官野宿風裂面君為淮南秀文采照金殿

君嘗考中進士

人第一胡為事奔走投筆腰羽箭更被髯叅軍豪篇來督

戰

其兄華老以詩寄之皆言戰事

親程三郡士玉石不能銜欲知君得

人失者亦稱善君才無不可要欲經百鍊吾詩堪咀嚼

聊送別酒嚙

李思訓畫長江絕島圖

山蒼蒼江茫茫大孤小孤江中央崖崩路絕猿鳥去惟有喬木攬天長客舟何處來棹歌中流聲抑揚沙平風

軟望不到孤山久與船低昂
我我兩煙鬟曉鏡開新粧
舟中賈客莫漫狂小孤前年嫁彭郎

次韻答王鞏

我有方外客顏如瓊之英
十年塵土窟一寸冰雪清
竭來從我游坦率見真情
顧我無足戀戀此山水清
新詩如彈丸脫手不整停
昨日放魚回衣巾滿浮萍
今日扁舟去白酒載烏程
山頭見月出江路聞鼙鳴
莫作孺子歌滄浪濯吾纓
吾詩自堪唱相子棹歌聲

張安道見示近詩

人物一衰謝微言難重尋
殷勤永嘉末復聞正始音
清談未足多感時意殊深
少年有奇志欲和南風琴
荒林蜩螗亂廢沼蛙蚓淫
遂欲掩兩耳臨文但噫噤
蕭然王郎子來自緱山陰

其壻王鞏攜來

云見浮丘伯吹簫明月岑遺

聲落淮泗蛟鼉為悲吟
願公正王度祈招繼惜惜

次韻王鞏顏復同泛舟

沈郎清瘦不勝衣
邊老便便帶十圍
蹉跎身輕山上走

謹呼船重醉中歸舞腰似雪金釵落談辯如雲玉麈麾
憶在錢塘正如此回頭四十二年非

次韻張十七九日贈子由

千戈萬槩擁旆籬九日清樽豈復持

是日南都
教使按兵

官事無

窮何日了菊花有信不吾欺逍遙瓊館真堪羨取次塵
纓未可縻迨此遐時須痛飲他年長劔拄君頤

次韻王鞏獨眠

居士身心如槁木旅館孤眠體生粟誰能相思琢白玉

服藥千朝償一宿天寒日短銀燈續欲往從之車脫軸
何人吹斷參差竹洒水茫茫鴨頭綠

次韻王鞏留別

去國已八年故人今有誰當時交游內未數蔡克兒豈
無知我者好爵半已縻爭為東閣吏不顧北山移公子
表獨立與世頗異馳不辭千里遠成此一段奇蛾眉亦
可憐無奈思餅師無人伴客寢惟有支牀龜君歸與何
人文字相娛嬉持此調張子一笑當脫頤

登雲龍山

醉中走上黃茆岡滿岡亂石如羣羊岡頭醉倒石作牀
仰看白雲天茫茫歌聲落谷秋風長路人舉首東南望
拍手大笑使君狂

次韻僧潛見贈

道人胸中水鏡清萬象起滅無逃形獨依古寺種秋菊
要伴騷人餐落英人間底處有南北紛紛鴻鴈何曾冥
閉門坐穴一禪榻頭上歲月空崢嶸今年偶出為求法

欲與慧劍加礪硎雲衲新磨山水出霜髭不翦兒童驚
公侯欲識不可得故知倚市無傾城秋風吹夢過淮水
想見橘柚垂空庭故人各在天一角相望落落如晨星
彭城老守何足顧棗林桑野相邀迎千山不憚荒店遠
兩脚欲趁飛猱輕多生綺語磨不盡尚有宛轉詩人情
猿吟鶴唳本無意不知下有行人行空堦夜雨自清絕
誰使掩抑啼孤惻我欲仙山掇瑤草傾筐坐歎何時盈
簿書鞭扑書填委煮茗燒栗宜宵征乞取摩尼照濁水

共看落月金盆傾

次韻潛師放魚

法師說法臨泗水無數天花隨塵尾
勸將淨業種西方莫待夢中呼起
起哀哉若魚竟坐口速愧知幾穆生醴
况逢孟簡對盧仝不怕校人欺予
美疲民尚作魚尾赤數畧未除吾
顙泚法師自有衣中珠不用辛苦沙
泥底與舒教授張山人參寥師同遊
戲馬臺書西軒

壁兼簡顏長道二首

古寺長廊院院行此軒偏慰旅人情楚山西斷如迎客
汴水南來故遶城路失玉鈎芳草合林亡白鶴古泉清
淡游何以娛庠老坐聽郊原琢磬聲

竹杖芒鞋取次行下臨官道見人情天寒菽粟猶栖畝
日莫牛羊自入城沽酒獨教陶令醉題詩誰似皎公清
更尋陋巷顏夫子乞取微言繼此聲

滕縣時同年西園

人皆種榆柳坐待十畝陰我獨種松柏守此一寸心君

看間里間盛衰日駸駸種木不種德聚散如飛禽老時
吾不識用意一何深知人得數士重義忘千金西園手
所開珍木來千岑養此霜雪根遲彼鸞鳳吟池塘得流
水龜魚自浮沈幽桂日夜長白花亂青衿豈獨蕃草木
子孫已成林拱把不知數會當出千尋樊侯種梓漆壽
張富華簪我作西園詩以為里人箴

次韻王廷老和張十七九日見寄

霜葉投空雀啁籬上樓筋力强扶持對花把酒未甘老

膏面染鬚聊自欺無事亦知君好飲多才終恐世相縻
請看平日銜杯口會有金椎為控頤

次韻參寥師寄秦太虛三絕句時秦君舉進士
不得

秦郎文字固超然漢武憑虛意欲仙底事秋來不得解
定中試與問諸天

一尾追風抹萬蹄崑崙玄圃謂朝隣回看世上無伯樂
却道鹽車勝月題

得喪秋毫久已冥不須聞此氣崢嶸何妨却伴參寥子
無數新詩咳唾成

與參寥師行園中得黃耳蕈

遣化何時取衆香法筵齋鉢久淒涼寒蔬病甲誰能採
落葉空畦半已荒老楮忽生黃耳菌故人兼致白牙薑
蕭然放筯東南去又入春山筍蕨鄉

百步洪二首

并敘

王定國訪余於彭城一日棹小舟與顏長道攜盼英卿

三子游泗水北上聖女山南下百步洪吹笛飲酒乘月
而歸余時以事不得往夜著羽衣佇立於黃樓上相視
而笑以為李太白死世間無此樂三百餘年矣定國既
去逾月復與參寥師放舟洪下追懷曩游已為陳迹喟
然而嘆故作二詩一以遺參寥一以寄定國且示顏長
道舒堯文邀同賦云

長洪斗落生跳波輕舟南下如投梭水師絕叫鳬鴈起
亂石一線爭磋磨有如兔走鷹隼落駿馬下注千丈坡

斷絃離柱箭脫手飛電過隙珠翻荷四山眩轉風掠耳
但見流沫生千渦嶮中得樂雖一快何異水伯夸秋河
我生乘化日夜逝坐覺一念逾新羅紛紛爭奪醉夢裏
豈信荊棘埋銅駝覺來俯仰失千劫回視此水殊委蛇
君看岸邊蒼石上古來篙眼如蜂窠但應此心無所住
造物雖駛如余何回船上馬各歸去多言嘵嘵師所呵
佳人未肯回秋波幼與欲語防飛梭輕舟弄水買一笑
醉中蕩漿肩相磨不似長安閭里俠貂裘夜走燕脂坡

獨將詩句擬鮑謝涉江共採秋江荷不知詩中道何語
但覺兩頰生微渦我時羽服黃樓上坐見織女初斜河
歸來笛聲滿山谷明月正照金叵羅奈何捨我入塵土
擾擾毛羣欺卧馳不念空齋老病叟退食誰與同委蛇
時來洪上看遺迹忍見屐齒青苔窠詩成不覺雙淚下
悲吟相對惟羊何欲遣佳人寄錦字夜寒手冷無人呵

送參寥師

上人學苦空百念已灰冷劍頭惟一吷焦穀無新穎胡

為逐吾輩文字爭蔚炳新詩如玉雪出語便清警退之
論草書萬事未嘗屏憂愁不平氣一寓筆所騁頗怪浮
屠人視身如丘井頽然寄淡泊誰與發豪猛細思乃不
然真巧非幻影欲令詩語妙無厭空且靜靜故了羣動
空故納萬境閱世走人間觀身卧雲嶺鹹酸雜衆好中
有至味永詩法不相妨此語當更請

夜過舒堯文戲作

先生堂前霜月苦弟子讀書喧兩廡推門入室書縱橫

蠋紙燈籠晃雲母先生骨清少眠卧長夜默坐數更鼓
耐寒石硯欲生冰得火銅餅如過雨郎君欲出先自贊
坐客斂衽誰敢侮明朝阮籍過阿戎應作義之美懷祖
十月十五日觀月黃樓席上次韻

中秋天氣未應殊不用紅紗照坐隅山下白雲橫匹素
水中明月卧浮圖未成短棹還三峽已約輕舟泛五湖
為問登臨好風景明年還憶使君無

答王定民

開緘奕奕滿銀鈎書尾題詩語更道八法舊聞宗長史
五言今復擬蘇州筆蹤好在留臺寺旗隊遙知到石溝
欲寄鼠須并蠶紙請君章草賦黃樓

次韻王廷老退居見寄二首

浪蕪浮花不辨春歸來方識歲寒人回頭自笑風波地
閉眼聊觀夢幻身北牖已安陶令榻西風還避庾公塵
更搔短髮東南望試問今誰畏舊巾

接果移花看補籬腰鎌手斧不妨持上都新事長先到

老圃閒談未易欺釀酒閑門開社蠶殺牛留客解耕縻
何時得見纖纖玉右手持盃左捧頤

次顏長道韻送傅倅

兩見黃花掃落英南山山寺遍題名宗成不獨依岑范
魯衛終當似弟兄去歲雲濤浮汴泗與君泥土滿衣纓
如今別酒休辭醉試聽雙洪落後聲

雲龍山觀燒得雲字

丁女真水妃寒山便火耘隕霜知已殺培戶聽初焚東

縕方熠燿敲石俄氤氲落點甘泉烽橫煙楚塞氛窮蛇
上喬木潛蛟躡浮雲驚飛墮傷鴈狂走迷癡磨谷蟄起
蜩鷲山妖竄夔夔野竹爆哀聲幽桂飄冤芬悲同秋照
蟬快若夏燎蚊火牛入燕壘燧象奔吳軍崩騰井陘口
萬馬皆朱幘搖曳驪山陰諸姨爛紅裙方隨長風卷忽
值絕澗分我本山中人習見匪獨聞偶從二三子來訪
張隱君君家亦何有物象移朝曛把酒看飛燼空庭落
繽紛行觀農事起畦壠如縕紋細雨發春穎嚴霜倒秋

黃始知一炬力洗盡狐兔羣

和田國博喜雪

疇昔月如晝曉來雲暗天玉花飛半夜翠浪舞明年螟
蠶無遺種流亡稍占田歲豐君不樂鐘磬幾時編

田有服不

樂

祈雪霧猪泉出城馬上作贈舒堯文

二年走吳越踏遍千里山朝隨白雲去莫與栖鴉還
翩如得木狖飛步誰能攀一為符竹累坐老敲榜間此行

亦何事聊散腰脚頑浩蕩城西南亂山如玦環山下野
人家桑柘雜榛菅歲晏風日暖人牛相對閒薄雪不蓋
土麥苗稀可刪願君發豪句嘲詆破天慳

次韻舒堯文祈雪霧猪泉

長笑蛇醫一寸腹銜冰吐雹何時足蒼鵝無罪亦可憐
斬頸橫盤不敢哭豈知泉下有猪龍卧枕雷車踏陰軸
前年太守為旱請雨點隨人如撒菽

傳欽之曾禱此泉得雨

太守

歸國龍歸泉至今人詠淇園綠我今又復罹此旱凜凜

疲民在溝瀆却尋舊迹叩神泉坐客仍攜王子淵

欽之時客

惟舒在矣看草中和樂職頌新聲妙語慰華顛曉來泉上東

風急須上冰珠老蛟泣怪詞欲逼龍飛起嶮韻不量吾
所及行看積雪厚埋牛誰與春工掀百蟄此時還復借
君詩餘力汰輶仍貫笠揮毫落紙勿言疲驚龍再起震
失匙

石炭

并引

彭城舊無石炭元豐元年十二月始遣人訪獲於州之

西南白土鎮之北以冶鐵作兵犀利勝常云

君不見前年雨雪行人斷城中居民風裂骨濕薪半束
抱衾裯日莫敲門無處換豈料山中有遺寶磊落如磨
萬車炭流膏迸液無人知陣陣腥風自吹散根苗一發
浩無際萬人鼓舞千人看投泥潑水愈光明爍玉流金
見精悍南山栗林漸可息北山頑鑛何勞鍛為君鑄作
百煉刀要斬長鯨為萬段

人日獵城南會者十人以身輕一鳥過槍急萬

人呼為韻軾得鳥字

兒童笑使君憂慍長悄悄誰拈白接羅令跨金驄裏東
風吹濕雪手冷怯清曉忽發兩鳴鶻相趁飛蟲小放弓
一長嘯目送孤鴻矯吟詩忘鞭轡不語頭自掉歸來仍
脫粟鹽豉煮芹蓼何似雷將軍兩眼霜鶻皎黑頭已為
將百戰意未了馬上倒銀鉞得免不暇燎少年負奇志
蹭蹬百憂繞回首英雄人老死已不少青春還一夢餘
年真過鳥莫上呼鷹臺平生笑劉表

將官雷勝得過字代作

胡騎入雲中急烽連夜過短刀穿虜陣濺血貂裘浣一
來輦轂下愁悶惟欲卧今朝從公獵稍覺天宇大一雙
鐵絲箭未發手先唾射殺雪毛狐腰間餘一箇

臺頭寺步月得人字

風吹河漢掃微雲步屨中庭月趁人
氾氾爐香初泛夜離離花影欲搖春
遙知金闕同清景想見氍毹車輟暗塵
回首舊游真是夢一簪華髮岸綸巾

臺頭寺送宋希元

相從傾蓋只今年送別南臺便黯然入夜更歌金縷曲

他時莫忘角弓篇

是日與宋君同栽松寺中

三年不顧東鄰女

取宋玉

二頃方求負郭田

取季子

我欲歸休君未可茂先方議斲

龍泉

種松得徠字

其四在懷古堂其六在石經院

春風吹榆林亂英飛作堆荒園一雨過戢戢千萬栽青
松種不生百株望一枚一枚已有餘氣壓千畝槐野人

易斗粟云自魯徂魯人不知貴萬竈飛青煤束縛同
一車胡為乎來哉泣然解其縛清泉洗浮埃枝傷葉尚
困生意未肯回山僧老無子養護如嬰孩坐待走龍蛇
清陰滿南臺孤根裂山石直幹排風雷我今百日客養
此千歲材時去替
不百日茯苓無消息雙鬢日夜摧古今一俛
仰作詩寄餘哀

作書寄王晉卿忽憶前年寒食北城之游走筆
為此詩

北城寒食煙火微落花蝴蝶作團飛王孫出游樂忘歸
門前驄馬紫金鞵吹笙帳底烟霏霏行人舉頭誰敢睇
扣門狂客君不麾更遣傾城出翠帷書生老眼省見稀
畫圖但覺周昉肥別來春物已再菲西望不見紅日圍
何時東山歌采薇把盞一聽金縷衣

往在東武與人往反作粲字韻詩四首今黃魯
直亦次韻見寄復和答之

符堅破荊州止獲一人半中郎老不遇但喜識元歎我

今獨何幸文字厭奇玩又得天下才相從百憂散陰求
我輩人規作林泉伴寧當待垂老倉卒收一旦不見梁
伯鸞空對孟光案才難不其然婦女廁周亂世豈無作
者於我如既盟獨喜誦君詩咸韶音節緩夜光一已多
矧獲纍纍貫相思君欲瘦不往我真懦吾儕春微祿寒
夜抱寸炭何時定相過徑就我乎館飄然東南去江水
清且渙相與訪名山微言師忍粲

雪齋

杭僧法言作
雪山於齋中

君不見蛾眉山西雪千里北望城都如井底春風百日
吹不消五月行人如凍蟻紛紛市人爭奪中誰信言公
似贊公人間熱惱無處洗故向西齋作雪峰我夢扁舟
適吳越長廊靜院燈如月開門不見人與牛惟見空庭
滿山雪

言有詩見寄云林
下閑看水牯牛

以雙刀遺子由子由有詩次其韻

寶刀匣不見但見龍雀鏤何曾斬蛟蛇亦未切琅玕胡
為穿窬輩見之要領寒吾刀不汝問有愧在其肝念此

乃自藏包之虎皮斑湛然如古井終歲不復瀾不憂無
所用憂在用者難佩之非其人匣中自長歎我老衆所
易屢遭非意干惟有王玄通堦庭秀芳蘭知子後必大
故擇刀所便屠狗非不用一歲六七剗欲試百鍊剛要
須更泥蟠作詩銘其背以待知者看

游桓山會者十人以春水滿四澤夏雲多奇峰
為韻得澤字

東郊欲尋春未見鶯花迹春風在流水鳬鴈先拍拍孤

帆信溶漾弄此半篙碧艤舟桓山下長笑理輕策彈琴
石室中幽響清磔磔弔彼泉下人野火失枯腊悟此人
間世何者為真宅暮回百步洪散坐洪上石愧我非王
襄子淵肯見客臨流吹洞簫水月照連壁謂王氏兄弟也此歡
真不朽回首歲月隔想象斜川游作詩繼彭澤

戴道士得四字代作

少小家江南寄跡方外士偶遇白雲出賣藥彭城市雪
霜侵鬢髮塵土汙冠袂賴此三尺桐中有山水意自從

夷夏亂七絲久已棄心知鹿鳴三不及胡琴四使君獨
慕古嗜好與衆異共弔桓魋宮一灑孟嘗淚歸來鎖塵
匣獨對斷絃喟挂名石壁間寂寞千歲事

次韻田國博部夫南京見寄二絕

歲月翩翩下坂輪歸來杏子已生仁深紅落盡東風惡
柳絮榆錢不當春

火冷餠稀杏粥稠青裙縞袂餉田頭大夫行役家人怨
應羨居鄉馬少游

月夜與客飲酒杏花下

杏花飛簾散餘春
明月入戶尋幽人
褰衣步月踏花影
炯如流水涵青蘋
花間置酒清香發
爭挽長條落香雪
山城薄酒不堪飲
勸君且吸盃中月
洞簫聲斷月明中
惟憂月落酒杯空
明朝卷地春風惡
但見綠葉樓殘紅

送蜀人張師厚赴殿試二首

忘歸不覺髮毛斑
好事鄉人尚往還
斷嶺不遮西望眼
送君直過楚王山

雲龍山下試春衣
放鶴亭前送落暉
一色杏花紅十里
新郎君去馬如飛

再次韻答田國博部夫還二首

西郊黃土沒車輪
滿面風埃笑路人
已放役夫三萬指
從教積雨洗殘春

枝上稀疏地上稠
忍看紅糝落牆頭
風流別乘多才思
歸趁西園秉燭遊

田國博見示石炭詩有鑄劍斬佞臣之句次韻

答之

楚山鐵炭皆奇物知君欲斫姦邪窟屬鏤無眼不識人
楚國何曾斬無極玉川狂直古遺民救月裁詩語寢真
千里妖蠶一寸鐵地上空愁蟻蝨臣

答郡中同僚賀雨

水旱行十年饑疫遍九土奇窮所向惡歲歲祈晴雨雖
非為已求重請終愧古鬼神亦知我老病入腰膂何曾
拜向人此意難不許重雲淒已合微潤先流礎蕭蕭止

還作坐聽及三鼓天明將吏集泥土滿靴屨登城望舜
麥綠浪風掀舞愧我賢友生雄篇鬪新語君看大熟歲
風雨占十五天地本無功祈禱何足數渡河不入境豈
若無蝗虎而況刑白鷺下策君勿取

罷徐州往南京馬上走筆寄子由五首

吏民莫扳援歌管莫悽咽吾生如寄耳寧獨為此別別
離隨處有悲惱緣愛結而我本無恩此涕誰為設紛紛
等兒戲鞭韉遭割截道邊雙石人幾見太守發有知當

解笑撫掌冠纓絕

父老何自來花枝裏長紅洗殘拜馬前請壽使君公前
年無使君魚鼈化兒童舉鞭謝父老正坐使君窮窮人
命分惡所向招災凶水來非吾過去亦非吾功

古汴從西來迎我向南京東流入淮泗送我東南行暫
別還復見依然有餘情春雨漲微波一夜到彭城過我
黃樓下朱欄照飛甍可憐洪上石誰聽月中聲

前年過南京麥老櫻桃熟今來舊游處櫻麥半黃綠歲

月如宿昔人事幾反覆青衫老從事坐穩生髀肉
鰥鰥閱三守迎送如轉轂歸耕何時決田舍我已卜

卜田向何許石佛山南路下有爾家川千畦種秔稌山
泉宅龍蜃平地走膏乳異時畝一金近欲為逃戶逝將
解簪紱賣劔買牛具故山豈不懷廢宅生蒿穰便恐桐
鄉人長祠仲卿墓

次韻曹九章見贈

蘧瑗知非我所師流年已似手中蓍正平獨肯從文舉

中散何曾靳孝尼，賣劍買牛真欲老。
得錢沽酒更無疑，雞豚異日為同社。
應有千篇唱和詩。

書泗州孫景山西軒

落日明孤塔，青山繞病身。
知君向西望，不愧塔中人。

過淮三首贈景山兼寄子由

好在長淮水，十年三往來。
功名真已矣，歸計亦悠哉。
今日風憐客，平時浪作堆。
晚來洪澤口，捍索響如雷。

過淮山漸好，松檜亦蒼然。
藹藹藏孤寺，泠泠出細泉。
故

人真吏隱小檻帶巖偏却望臨淮市東風語笑傳
回首濉陽幕簿書高没人何時桐柏水一洗庾公塵此
去漸佳境獨游長慘神待君詩百首來寫浙西春

舟中夜起

微風蕭蕭吹菰蒲開門看雨月滿湖舟人水鳥兩同夢
大魚驚竄如奔狐夜深人物不相管我獨形影相嬉娛
暗潮生渚弔寒蛭落月挂柳看懸蛛此生忽忽憂患裏
清境過眼能須臾雞鳴鐘動百鳥散船頭擊鼓還相呼

余去金山五年而復至次舊詩韻贈寶覺長老
誰能斗酒博西涼但愛齋廚法豉香舊事真成一夢過
高談為洗五年忙清風偶與山阿曲明月聊隨屋角方
稽首願師憐久客直將歸路指茫茫

遊惠山

并敘

余昔為錢塘倅往來無錫未嘗不至惠山既去五年復
為湖州與高郵秦太虛杭僧參寥同至覽唐處士王武
陵竇羣朱宿所賦詩愛其語清簡蕭然有出塵之姿追

用其韻各賦三首

夢裏五年過覺來雙鬢蒼還將塵土足一步漪瀾堂俯
窺松桂影仰見鴻鶴翔炯然肝腑間已作冰玉光虛明
中有色清淨自生香還從世俗去永與世俗忘

薄雲不遮山疎雨不濕人蕭蕭松徑滑策策芒鞋新嘉
我二三子皎然無緇磷勝游豈殊昔清句仍絕塵弔古

泣舊史疾諛歌小旻哀哉扶風子難與巢許隣

謂實
羣

敲火發山泉烹茶避林樾明牕傾紫瓊色味兩奇絕吾

生眠食耳一飽萬想滅頗笑玉川子饑弄三百月豈如
山中人睡起山花發一甌誰與共門外無來轍

贈惠山僧惠表

行遍天涯意未闌將心到處遣人安山中老宿依然在
案上楞嚴已不看欹枕落花餘幾片閉門新竹自千竿
客來茶罷空無有盧橘楊梅尚帶酸

贈錢道人

書生苦信書世事仍臆度不量力所負輕出千鈞諾當

時一快意事過有餘忤不知幾州鐵鑄此一大錯我生
涉憂患常恐長罪惡靜觀殊可喜脚淺猶容却而况錢
夫子萬事初不作相逢更何言無病亦無藥

與秦太虛參寥會于松江而關彥長徐安中適
至分韻得風字二首

吳越溪山興未窮又扶衰病過垂虹浮天自古東南水
送客今朝西北風絕境自忘千里遠勝游難復五人同
舟師不會留連意擬看斜陽萬頃紅

二子緣詩老更窮人間無處吐長虹平生睡足連江雨
盡日舟橫擘岸風人笑年來三黜慣天教我輩一樽同
知君欲寫長相憶更送銀盤尾鬣紅

次韻關令送魚

舉網驚呼得巨魚饒涎不易忍流酥更煩赤腳長須老
來赴西風十幅蒲

東坡全集卷十

謹案卷九第四頁後六行寒食德公方上冢刊本

德訛得據施本改

第二十二頁前一行中秋見月寄子瞻刊本瞻訛

由按此詩係子由作附入集中今改

第二十四頁後八行余為殿試編排官刊本試訛

後據施本改

卷十第三頁前二行更被髻叅軍刊本叅訛將據

施本改

第六頁後五行不怕校人欺子美刊本美訛產據

施本改

第十頁後六行詩法不相妨刊本詩訛清據施本

改

第十六頁後七行作書寄王晉卿刊本書訛詩據

施本改

第二十三頁前一行中散何曾靳孝尼刊本孝訛

老據施本及晉書改

總校官庶吉士臣張能照

校對官庶吉士臣陳文樞

校對官編修臣朱攸

謄錄監生臣呂燕昭

謄錄監生臣張君紱

欽定四庫全書薈要

集部

東坡全集卷十一

二



詳校官助教臣常循

東坡全集卷十一

宋 蘇軾 撰

詩七十二首

次韻秦太虛見戲耳聾

東坡全集卷十一
君不見詩人借車無可載留得一錢何足賴晚年更似
杜陵翁右臂雖存耳先聾人將蟻動作牛鬪我覺風雷
真一噫聞塵掃盡根性空不須更枕清流派大朴初散
失混沌六鑿相攘更勝敗眼花亂墜酒生風口業不停

詩有債君知五蘊皆是賊人生一病今先差但恐此心
終未了不見不聞還是礙今君疑我特佯聾故作嘲詩
窮嶮怪須防額癢出三耳莫放筆端風雨快

端午遍遊諸寺得禪字

肩輿任所適遇勝輒留連焚香引幽步酌茗開淨筵微
雨止還作小窓幽更妍盆山不見日草木自蒼然忽登
最高塔眼界窮大千卞峰照城郭震澤浮雲天深沈既
可喜曠蕩亦所便幽尋未云畢墟落生晚煙歸來記所

歷耿耿清不眠道人亦未寢孤燈同夜禪

送劉寺丞赴餘姚

中和堂後石楠樹與君對牀聽夜雨玉笙哀怨不逢人
但見香煙橫碧縷謳吟思歸出無計坐想蟋蟀空房語
明朝開鑠放觀潮豪氣正與潮爭怒銀山動地君不看
獨愛清香生雪霧別來聚散如宿昔城郭空存鶴飛去
我老人間萬事休君亦洗心從佛祖手香新寫法界觀
眼淨不覩登伽女餘姚古縣亦何有龍井白泉甘勝乳

千金買斷顧渚春似與越人降日注

李公擇過高郵見施大夫與孫莘老賞松詩憶

與僕去歲會于彭門折花餽筍故事作詩二

十四韻見戲依韻奉荅亦以一戲公擇云爾

汝陽真天人絹帽著紅槿纏頭三百萬不買一微哂共

誇青山峯曲盡花不隕當時謫仙人逸韻謝封畛詩成

天一笑萬象解寒窘驚開小桃杏不待雷發軫餘波尚

涓滴乞與居易稔爾來誰復見前輩風流盡寂寞兩詩

人殘紅對櫻筍饑腸得一醉妙語傳不泯君來恨不與
更復相牽引我老心已灰空煩扇餘燼天遊照六鑿虛
空掃充初懸知色竟空那復嗜烏吻蕭然一方丈居士
老龐蘊散花從滿被不荅天女問故人猶故目怨句寫
餘恨疑我此心在遮防費欄楯應虞已斃蛇折尾時一
蠹仄聞孟光賢未學處仲忍開閣放出
事見本傳寄招應已足左
右侍雲鬢何時花月夜羊酒謝不敏此生如幻耳戲語
君勿愠應同亡是公一對子虛听

王鞏清虛堂

清虛堂裏王居士閉眼觀身如止水水中照見萬象空
敢問堂中誰隱几吳興太守老且病堆案滿前長渴睡
願君勿笑反自觀夢幻去來殊未已長疑安石恐不免
未信犀首終無事勿將一念住清虛居士與我蓋同耳
和孫同年卞山龍洞禱晴

吳興連月雨釜甑生魚蛙往問卞山龍曷不安厥家梯
空上巉絕俯視驚谿谷神井湧雲蓋陰崖垂薜花交流

百道泉赴谷走羣蛇不知落何處隱隱如縑車我來叩
石戶飛鼠翻白鴉寄語洞中龍睡味豈不嘉雨師少弭
節雷師亦停槌積水得反壑稻苗出泥沙農夫免菜色
龍亦飽豚獮看君擁黃紬高卧放晚衙

乘舟過賈收水閣收不在見其子三首

愛酒陶元亮能詩張志和青山來水檻白雨滿漁蓑淚
垢添丁面貧低舉案蛾不知何所樂竟夕獨酣歌

嫋嫋風蒲亂猗猗水荇長小舟浮鴨綠大杓瀉鵝黃得

意詩酒社終身魚稻鄉樂哉無一事何處不清涼
曳杖青苔岸繫船枯柳根德公方上冢季路獨留言已
占蒲魚港更開松菊園從茲來往數兒女自應門

次韻孫祕丞見贈

感慙清哀似變風老於詩句耳偏聰迂疎自笑成何事
冷淡誰能用許功不怕飛蚊如立豹肯隨白鳥過垂虹
吟哦相對忘三伏擬泛冰溪入雪宮

湖州多蚊豹脚尤
毒垂虹吳江亭名

與客遊道場何山得鳥字

清溪到山盡飛路盤空小紅亭與白塔隱見喬木杪中
休得小庵孤絕寄雲表洞庭在北戶雲水天渺渺庵僧
俗緣盡淨業洗未了十年畫鵲竹益以詩自繞高堂儼
像設禪室各深窈奔泉何處來華屋過溪沿何山隔幽
谷去路清且悄長松度翠蔓絕壁掛啼鳥我友自杭來
尚歎所歷少歸塗風雨作一洗紅日燎俄驚萬竅號黑
霧卷蓬蓼舟人紛變色坐羨輕鷗矯我獨喚酒杯醉死
勝流殍書生例強狠造物空煩擾更將掀舞勢把燭畫

風篠美人為破顏正似腰支嫋明朝更陳迹清景墮空
杳作詩記餘歡萬古一昏曉

僕去杭五年吳中仍歲大饑疫故人往往逝去
聞湖上僧舍不復往日繁麗獨淨慈本長老
學者益盛作此詩寄之

來往三吳一夢間故人半作冢累然獨依舊社傳真法
要與遺民度厄年趙叟近聞還印綬竺翁先已返林泉
何時杖策相隨去任性逍遙不學禪

舶趁風并引

吳中梅雨既過颯然清風彌旬歲歲如此湖人謂之舶
趁風是時海舶初回云此風自海上與舶俱至云爾
三旬已過黃梅雨萬里初來舶趁風幾處縈回度山曲
一時清駛滿江東驚飄簌簌先秋葉喚醒昏昏嗜睡翁
欲作蘭臺快哉賦却嫌分別問雌雄

丁公默送螭蟬

溪邊石蟹小如錢喜見輪囷赤玉盤
半殼含黃宜點酒

兩螯斫雪勸加餐蠻玆海錯聞名久怪雨腥風入座寒
堪笑吳興饒太守一詩換得兩尖團

送孫著作赴考城兼寄錢醇老李邦直二君於
孫處有書見及

使君閒如雲欲出誰肯伴清風獨無事一嘯亦可喚來
從白蘋洲吹我明月觀門前遠行客青衫流白汗問子
何忽忽王事不可緩故人錢與李清廟兩圭瓚蔚為萬
乘器尚記溝中斷子亦東南玆價重不可算別情何以

慰酒盡對空案惟持一榻涼勸子巾少岸此風那復有
塵土飛灰炭欲寄二大夫發發不可絆

泛舟城南會者五人分韻賦詩得人皆苦炎字

四首

城中樓閣似魚鱗不見清風起白蘋試選茗溪寂深處
仍呼我輩不羈人窺船野鶴何曾下見燭飛蟲空自馴
遶郭荷花一千頃誰知六月下塘春

苦熱誠知處處皆何當危坐學心齋海螫要共詩人把

溪月行遭霧雨靈鄉國飄零斷書信弟兄流落隔江淮
便應築室蒼溪上荷葉遮門水浸堦

紫蟹鱸魚賤如土得錢相付何曾數碧筒時作象鼻彎
白酒微帶荷心苦運肘風生看斫膾隨刀雪落驚飛縷
不將醉語作新詩飽食應慙腹如鼓

橋上游人夜未厭共依水檻立風簷樓中煮酒初嘗炙
月下新粧半出簾南郭清游繼顏謝北窓歸卧等羲炎
人間寒熱無窮事自笑疎頑不受疢

次韻李公擇梅花

詩人固長貧日午饑未動偶然得一飽萬象困嘲弄尋
花不論命愛雪長忍凍天公非不憐聽飽即喧閨君為
三郡守所至滿賓從江湖常在眼詩酒事豪縱奉使今
折磨清比於陵仲永懷茶山下攜妓脩春貢更憶檻泉
亭插花雲髻重蕭然卧瀟麓愁聽春禽哢忽見早梅花
不飲但孤諷詩成獨寄我字字愈頭痛嗟君本侍臣筆
橐從上雍脫鞞吟芍藥給札賦雲夢何人慰流落嘉蔭

天為種杯傾笛中吟帽拂果下鞵感時念羈旅此意吾
儕共故山亦何有桐花集么鳳君亦憶匡廬歸掃藏書
洞何當種此花各抱漢陰壑

送淵師歸徑山

我昔常為徑山客至今詩筆餘山色師住此山三十年
妙語應須得山骨溪城六月水雲蒸飛蚊猛捷如花鷹
羨師方丈冰雪冷蘭膏不動長明燈山中故人知我至
爭來問訊今何似為言百事不如人兩眼猶能書細字

徑山夏無蚊余舊詩云問龍乞
水歸洗眼欲看細字銷殘年

送表忠觀錢道士歸杭

先王舊德在民心著令稱忠上意深墮淚行看會祠下
挂名爭欲刻碑陰淒涼破屋塵凝座憔悴雲孫雪滿簪
未信諸豪容郭解却從他縣施千金

次韻周開祖長官見寄

俯仰東西閱數州老於岐路豈伶優初聞父老推謝令
旋見兒童迎細侯政拙年年祈水旱民勞處處避嘲謳

河吞巨野那容塞盜入蒙山不易搜仕道固應慙孔孟
扶顛未可責求由漸謀田舍猶懷祿未脫風濤且傍洲

罔罔可憐真喪狗時時相觸是虛舟竭來震澤都如夢

只有茗溪可倚樓齋釀酸甜如蜜水樂工零落似風颿

遠思顏柳并諸謝近憶張

子陳

令舉

與老劉

孝叔

風定軒窓

飛豹脚雨餘欄檻上蝸牛舊遊到處皆蒼蘚同甲惟君

尚黑頭憶昔湖山共尋勝相逢杯酒兩忘憂醉看梅雪

清香過夜棹風船駭汗流百首共成山上集三人俱作

月中遊海南未起垂天翼澗底仍依徑寸床已許秋風
歸過我預憂詩筆老難躊此生歲月行飄忽晚節功名
亦繆悠犀首正緣無事飲馮驩應為有魚留從今便踏
青州麴薄酒知君笑督郵

林子中以詩寄文與可及余與可既沒追和其
韻

斯人所甚厭投畀每不受欲其少須臾奪去惟恐後云
誰尸此職無乃亦假守賦才有巨細無異斛與斗胡不

安其分但聽物所誘時來各飛動意合無妍醜坐令雞
栖車長載朱伯厚平生無一旅既死咤萬口自聞與可
亡胸臆生堆阜懸知臨絕意要我一執手相望五百里
安得自其牖遺文付來哲後事待諸友伶俜嵇紹孤老
病孟光偶世人賤目見爭笑千金帚君詩與楚詞識者
當有取但知愛墨竹此歎吾已久故人多厚祿能復哀
君否不見林與蘇饑寒自奔走

與王郎昆仲及兒子邁遠城觀荷花登峴山亭

晚入飛英寺分韻得月明星稀四首

昨夜雨鳴渠曉來風襲月蕭然欲秋意溪水清可啜環
城三十里處處皆佳絕蒲蓮浩如海時見舟一葉此間
真避世青莢低白髮相逢欲相問已逐驚鷗沒

清風定何物可愛不可名所至如君子草木有嘉聲我
行本無事孤舟任斜橫中流自偃仰適與風相迎舉杯
屬浩渺樂此兩無情歸來兩溪間雲水夜自明

苔水如漢水鱗鱗鴨頭青吳興勝襄陽萬瓦浮青冥我

非羊叔子愧此峴山亭悲傷意則同歲月如流星從我
兩王子高鴻插脩翎湛輩何足道當以德自銘

吏民憐我懶鬪訟日已稀能為無事飲可作不夜歸復
尋飛英游盡此一寸暉撞鐘履聲集顛倒雲山衣我來
無時節杖屨自推扉莫作使君看外似中已非

城南縣尉水亭得長字

兩尉鬱相望東南百步塲揮旗蒲柳市伐鼓水雲鄉已
作觀魚檻仍開射鴨堂全家依畫舫極目亂紅粧潏潏

波頭細踈踈雨脚長我來閒濯足溪漲欲浮牀澤國山
圍裏孤城水影傍欲知歸路處葦外記風檣

與胡祠部遊法華山

陂湖欲盡山為界始見寒泉落高派道人未放泉出山
曲折虛堂瀉清快使君年老尚兒戲綠棹紅船舞澎湃
一笑翻杯水濺裙餘懽濯足波生隘長松攬天龍起立
蒼藤倒谷雲崩壞仰穿蒙密得清曠一覽震澤吁可怪
誰云四萬八千頃渺渺東盡日所矚歸塗十里盡風荷

清唱一聲聞露薤

是日樂工有作此聲者

嗟余少小慕真隱白髮

青衫天所械忽逢佳士與名山何異枯楊便馬疥君猶
鸞鶴偶飄墮六翮如雲豈長鍛不將新句紀茲遊恐負
山中清淨債

又次前韻贈賈耘老

具區吞滅三州界浩浩湯湯納千派從來不著萬斛船
一羣漁舟恣奔快仙壇古洞不可到空聽餘瀾鳴泮泮
今朝偶上法華嶺縱觀始覺人寰隘山頭卧碣弔孤冢

下有至人僵不壞空餘白棘網秋蟲無復青蓮出幽怪

事見本院碑

我來徙倚長松下欲掘茯苓親洗晒聞道山中

富奇藥往往靈芝雜葵薤詩人空腹待黃精生事只看

長柄械

杜子美詩云長鏡長鏡白木柄我生託子以為命

今年大熟期一飽食

葉微蟲真癬疥

今歲有小蟲食葉不甚為害

白花半落紫穠香攘臂欲

助磨鎌鍛安得山泉變春酒與子一洗尋常債

趙閱道高齋

見公奔走謂公勞聞公隱退云公高公心底處有高下

夢幻去來隨所遭不知高齋竟何義此名之設緣吾曹
公年四十已得道俗緣未盡餘伊舉功名富貴俱逆旅
黃金知繫何人袍超然已了一大事挂冠而去真秋毫
坐看猿猱落置罔兩手未肯置所操乃知賢達與愚陋
豈直相去九牛毛長松百尺不自覺企而羨者蓬與蒿
我欲贏糧往問道未應舉臂辭盧敖

送俞節推

尚之子尚
字退翁

吳興有君子淡如朱絲琴一唱三太息至今有遺音嗟

余與夫子相避如辰參

退翁官于蜀余在京師余歸而退翁去及余官于吳興則退翁

亡猶喜見諸郎窈然清且深異時多良士末路喪初心

我生不有命其肯枉尺尋

次韻答孫侔

十年身不到朝廷欲伴騷人賦落英但得低頭拜東野
不辭中路伺淵明艤舟苔雪人安在下築江淮計已成
千里論交一言足與君益亦不須傾

重寄一首

凜然高節照時人不信微官解浼君
蔣濟謂能來阮籍
薛宣真欲吏朱雲好詩衝口誰能擇
俗子疑人未遣聞
乞取千篇看俊逸不將輕比鮑參軍

次韻和劉貢甫登黃樓見寄并寄子由二首

清派連淮上黃樓冠海隅此詩尤偉麗
夫子計魁梧劉為

人短小世俗輕瑚璉巾箱襲武夫坐令乘傳遽奔走為儲

須邂逅我已失登臨誰與俱貧貧倉氏粟身聽治家撫
會合難前定歸休試後圖腴田未可買窮鬼却須呼欲本

買田於泗上二水何年到雙洪不受艫至今清夜夢飛
近已不遂矣

轡策天吳

此詩寄劉

與子皆去國十年天一隅數奇逢惡歲計拙集枯梧好
士餘劉表窮交憶灌夫不矜持漢節猶許攬桓須清句

金絲合高樓雪月俱吟哦出新意指畫想前櫺

子由初赴南京

送之出東門登城上覽山川之勝云此地可作樓觀於是始有改築之意

自寫千言賦新裁

六幅圖

近以絹自寫子由黃樓賦為六幅圖甚妙

傳看一坐聳勸著尺書呼

莫使騷人怨東游不到吳

此詩寄子由

陳州與文郎逸民飲別攜手河堤上作此詩

白酒無聲滑瀉油醉行堤上散吾愁春風料峭羊角轉
河水渺綿瓜蔓流君已思歸夢已峽我能未到說黃州
此生聚散何窮已未忍悲歌學楚囚

子由自南都來陳三日而別

夫子自逐客尚能哀楚囚奔馳二百里徑來寬我憂相
逢知有得道眼清不流別來未一年落盡驕氣浮嗟我
晚聞道欸啟如孫休至言雖久服放心不自收悟彼善

知識妙藥應所投納之憂患場磨以百日愁冥頑雖難
化鑄發亦已周平時種種心次第去莫留但餘無所還
永與夫子遊此別何足道大江東西州畏蛇不下榻睡
足吾無求便為齊安民何必歸故丘

正月十八日蔡州道上遇雪次子由韻二首

蘭菊有生意微陽回寸根方憂集莫雪復喜迎朝曦憶
我故居室浮光動南軒松竹半傾瀉未數莢與萱三徑
瑤草合一餅井花溫至今行吟處尚餘履舄痕一朝出

從仕永愧李仲元晚歲益可羞犯雪方南奔山城買廢
園槁葉手自掀長使齊安人指說故侯園

鉛膏染髭鬚旋露霜雪根不如閉目坐丹府夜自噉誰
知憂患中方寸寓羲軒大雪從壓屋我非兒女萱平生
學踵息坐覺兩轡溫下馬作雪詩滿地鞭箠痕佇立望
原野悲歌為黎元道逢射獵子遙指狐兔奔蹤跡尚可
尋窟穴何足掀寄謝李丞相吾將反丘園

過新息留示鄉人任師中

任時知瀘州
亦坐事對獄

昔年嘗羨任夫子卜居新息臨淮水怪君便爾忘故鄉

稻熟魚肥信清美竹陂鴈起天為黑

小竹陂在縣北

桐柏煙橫

山半紫

桐栢廟在縣南

知君坐受兒女困悔不先歸弄清泚塵

埃我亦失收身此行躊躇尤可鄙寄食方將依白足附

書未免煩黃耳往雖不及來有年詔恩倘許歸田里却

下關山入蔡州為買烏捷三百尾

黃州出水牛

過淮

朝離新息縣初亂一水碧莫宿淮南村已渡千山赤磨

廳號古戍霧雨暗破驛回頭梁楚郊永與中原隔黃州
在何許想像雲夢澤吾生如寄耳初不擇所適但有魚
與稻生理已自畢獨喜小兒子少小事安佚相從艱難
中肝肺如鐵石便應與晤語何止寄衰疾時家在子由處獨與兒子來邁南

書磨公詩後并序

過加祿鎮南二十五里大許店休焉于逆旅初宗祥家
見壁上有幅紙題詩云滿院秋光濃欲滴老僧倚杖青

松側只怪高聲問不應瞋余踏破蒼苔色其後題云滄水僧寶磨宗祥謂余此光黃間狂僧也年百三十死於熙寧十年既死人有見之者宗祥言其異事甚多作是詩以識之磨公本名清戒俗謂之戒和尚云

磨公昔未化來往淮山曲壽逾兩甲子氣壓諸尊宿但嗟濁惡世不受龍象蹴我來不及見悵望空遺躅霜顱隱白毫鎖骨埋青玉皆云似達磨隻履還天竺壁間餘清詩字勢頗拔俗為吟五字偈一洗凡眼肉

游淨居寺

并敘

寺在光山縣南四十里大蘇山之南小蘇山之北寺僧
居仁為余言齊天保中僧思惠過此見父老問其姓曰
蘇氏又得二山名乃歎曰吾師告我遇三蘇則住遂留
結庵而父老竟無有蓋山神也其後僧智顗見思於此
山而得法焉則世所謂思大和尚智者大師是也唐神
龍中道岸禪師始建寺於其地廣明庚子之亂寺廢於
兵火至乾興中乃復而賜名曰梵天云

十載游名山自製山中衣願言畢婚嫁攜手老翠微不
悟俗緣在失身蹈危機刑名非夙學陷穽損積威遂恐
死生隔永與雲山違今日復何日芒鞋自輕飛稽首兩
足尊舉頭雙涕揮靈山會未散八部猶光輝願從二聖
往一洗千劫非裴回竹溪月空翠搖煙霏鐘聲自送客
出谷猶依依回首吾家山歲晚將焉歸

梅花二首

春來幽谷水潺潺的礫梅花草棘間一夜東風吹石裂

半隨飛雪渡關山

何人把酒慰深幽，開自無聊落更愁。
幸有清溪三百曲，不辭相送到黃州。

戲作種松

我昔少年日，種松滿東岡。
初移一寸根，瑣細如插秧。
二年黃茅下，一一攢麥芒。
三年出蓬艾，滿山散牛羊。
不見十餘年，想作龍蛇長。
夜風波浪碎，朝露珠璣香。
我欲食其膏，已伐百本桑。

煮松脂法用桑柴灰水

人事多乖迕，神藥竟渺

茫竭來齊安野夾路須髯蒼會開龜蛇窟不惜斧斤創
縱未得伏苓且當拾流肪釜盎百出入皎然散飛霜槁
死三彭仇澡換五穀腸青骨凝綠髓丹田發幽光白髮
何足道要使雙瞳方却後五百年騎鶴還故鄉

萬松亭

并敘

麻城縣令張毅植萬松於道周以庇行者且以名其亭
去未十年而松之存者十不及三四傷來者之不嗣其
意也故作是詩

十年栽種百年規好德無人助我儀

古語云一年之計樹之以穀十年之

計樹之以木百年之計樹之以德

縣令若同倉庾氏亭松應長子孫枝

天公不救斧斤厄野火解憐冰雪姿為問幾株能合抱
慇懃記取角弓詩

張先生并敘

先生不知其名黃州故縣人本姓盧為張氏所養陽狂
垢汙寒暑不能侵常獨行市中夜或不知其所止往來
者欲見之多不能致余試使人召之欣然而來既至立

而不言與之言不應使之坐不可但俯仰熟視傳舍堂
中久之而去夫孰非傳舍者是中竟何有乎然余以有
思惟心追躡其意蓋未得也

熟視空堂竟不言故應知我未天全肯來傳舍人皆說
能致先生予亦賢脫屣不妨眠糞屋流澌爭看浴冰川
士廉豈識桃椎妙妄意稱量未必然

陳季常所蓄朱陳村嫁娶圖

何年顧陸丹青手畫作朱陳嫁娶圖聞道一村惟兩姓

不將門戶買崔盧

我是朱陳舊使君
勸耕曾入杏花村
而今風物那堪畫

縣吏催錢夜打門

朱陳村在徐州蕭縣

少年時嘗過一村
院見壁上有詩云
夜涼疑有

雨院靜似無僧
不知何人詩也
宿黃州禪智

寺寺僧皆不在
夜半雨作偶記
此詩故作一

絕

佛燈漸暗饑鼠出
山雨忽來脩竹鳴
知是何人舊詩句

已應知我此時情

初到黃州

自笑平生為口忙，老來事業轉荒唐。
長江遶郭知魚美，好竹連山覺筍香。
逐客不妨員外置，詩人例作水曹郎。
只慙無補絲毫事，尚費官家壓酒囊。

檢校官例折支
多得退酒袋

定惠院寓居月夜偶出

幽人無事不出門，偶逐東風轉良夜。
參差玉宇飛木末，繚繞香煙來月下。
江雲有態清自媚，竹露無聲浩如瀉。

已驚弱柳萬絲垂尚有殘梅一枝亞清詩獨吟還自和
白酒已盡誰能借不辭青春忽忽過但恐懽意年年謝
自知醉耳愛松風會棟霜林結茅舍浮浮大甌長炊玉
溜溜小槽如壓蔗飲中真味老更濃醉裏狂言醒可怕
但當謝客對妻子倒冠落佩從嘲罵

次韻前篇

去年花落在徐州對月酣歌美清夜

去年徐州花下對月與張君厚王子

忠兄弟飲酒作頻字韻詩

今年黃州見花發小院閉門風露下萬事

如花不可期餘年似酒那禁瀉憶昔還鄉汴巴峽落帆

樊口

在黃州南岸

高梳亞長江衮衮空自流白髮紛紛寧少

借竟無五畝繼沮溺空有千篇陵鮑謝至今歸計負雲
山未免孤衾眠客舍少年辛苦真食蓼老景清閒如啖
蔗饑寒未至且安居憂患已空猶夢怕穿花踏月飲村
酒免使醉歸官長罵

安國寺浴

老來百事懶身垢猶念浴衰髮不到耳尚煩月一沐山

城足薪炭煙霧濛湯谷塵垢能幾何
脩然脫羈梏披衣坐小閣散髮臨脩竹
心困萬緣空身安一牀足豈惟忘淨穢
兼以洗榮辱默歸無多談此理觀要熟

安國寺尋春

卧聞百舌呼春風起尋花柳村村
同城南古寺脩竹合小房曲檻歌
深紅看花歎老憶年少對酒思家
愁老翁病眼不羞雲母亂鬢絲
強理茶煙中遙知二月王城外
玉仙洪福花如海薄羅勻霧蓋
新粧快馬爭風鳴雜珮

玉川先生真可憐一生耽酒終無錢
病過春風九十日獨抱添丁看花發

寓居定惠院之東雜花滿山有海棠一株土人不知貴也

江城地瘴蕃草木只有名花苦幽獨
嫣然一笑竹籬間桃李漫山總麤俗
也知造物有深意故遣佳人在空谷
自然富貴出天姿不待金盤薦華屋
朱唇得酒暈生臉翠袖卷紗紅映肉
林深霧暗曉光遲日暖風輕春睡足

雨中有淚亦悽愴月下無人更清淑先生食飽無一事
散步逍遙自捫腹不問人家與僧舍拄杖敲門看修竹
忽逢絕艷照衰朽歎息無言揩病目陋邦何處得此花
無乃好事移西蜀寸根千里不易到銜子飛來定鴻鵠
天涯流落俱可念為飲一樽歌此曲明朝酒醒還獨來
雪落紛紛那忍觸

次韻樂著作野步

老來幾不辨西東秋後霜林且強紅眼暈見花真是病

耳虛聞蟻定非聰酒醒不覺春強半睡起常驚日過中
植杖偶逢為黍客披衣閒詠舞雩風仰看落蕊收松粉
俯見新芽摘杞叢楚雨還昏雲夢澤吳潮不到武昌宮
黃州對岸武昌縣有孫權故宮廢興古郡詩無數寂寞閑窓易粗通解
組歸來成二老風流他日與君同

二月二十六日雨中熟睡至晚強起出門還作
此詩意思殊昏昏也

卯酒困三盃午餐便一肉雨聲來不斷睡味清且熟昏

金
夕
日
人
卷十一
昏覺還卧展轉無由足強起出門行孤夢猶可續泥深
竹雞語村暗鳩婦哭明朝看此詩睡語應難讀

雨晴後步至四望亭下魚池上遂自乾明寺前
東岡上歸二首

雨過浮萍合蛙聲滿四鄰海棠真一夢梅子欲嘗新挂
杖閑挑菜鞦韆不見人慙慙木芍藥獨自殿餘春
高亭廢已久下有種魚塘暮色千山入春風百草香市
橋人寂寂古寺竹蒼蒼鸛鶴來何處號鳴滿夕陽

雨中看牡丹三首

霧雨不成點，映空疑有無。
時於花上見，的皪走明珠。
秀色洗紅粉，暗香生雪膚。
黃昏更蕭瑟，頭重欲相扶。

明日雨當止，晨光在松枝。
清寒入花骨，肅肅初自持。
午景發穠麗，一笑當及時。
依然暮還斂，亦自惜幽姿。

幽姿不可惜，後日東風起。
酒醒何所見，金粉抱青子。
千花與百草，共盡無妍鄙。
未忍汙泥沙，牛酥煎落葉。

次韻樂著作送酒

少年多病怯盃觴老去方知此味長萬斛羈愁都似雪
一壺春酒若為湯

次韻樂著作天慶觀醮

濁世紛紛肯下臨夢尋飛步五雲深無因上到通明殿
只許微聞玉佩音

王齊萬秀才寓居武昌縣劉郎汭正與伍洲相
對伍子胥奔吳所從渡江也

君家稻田冠西蜀檇玉揚珠三萬斛塞江流梯起書樓

碧瓦朱欄照山谷，傾家取樂不論命。
散盡黃金如轉燭，惟餘舊書一百車。
方舟載入荆江曲，江上青山亦何有。
伍洲遙望劉郎藪，明朝寒食當過君。
請殺耕牛壓私酒，與君飲酒細論文。
酒酣訪古江之濱，仲謀公瑾不須弔。

一酹波神英烈君

杭州伍子胥廟封英烈王

杜沂遊武昌，以酹釀花菩薩泉見餉二首

酹釀不爭春，寂寞開最晚。
青蛟走玉骨，羽蓋蒙珠幃。
不粧艷已絕，無風香自遠。
淒涼吳宮闕，紅粉埋故苑。
至今

微月夜笙簫來絕囀餘妍入此花千載尚清婉怪君呼
不歸定為花所挽昨宵雷雨惡花盡君應返

君言西山頂自古流白泉上為千牛乳下有萬石鉛不
愧惠山味但無陸子賢願君揚其名庶託文字傳寒泉
比吉士清濁在其源不食我心惻於泉非所患嗟我本
何有虛名空自纏不見子柳子餘愚汙溪山

陳季常自岐亭見訪郡中及舊州諸豪爭欲邀
致之戲作陳孟公詩一首

孟公好飲寧論斗醉後關門防客走不妨閒過左阿君
百謫終為賢太守老居閭里自浮湛笑問伯松何苦心
忽然載酒從陋巷為愛揚雄作酒箴長安富兒求一過
千金壽君君笑唾汝家安得客孟公從來只識陳驚座

東坡全集卷十一

東坡全集卷十二

宋 蘇軾 撰

詩八十九首

游武昌寒溪西山寺

連山蟠武昌翠木蔚樊口
我來已百日欲濟空搔首
坐看鷗鳥沒夢逐麝麝走
今朝橫江來一葦寄衰朽
高談破巨浪飛屨輕重阜
去人曾幾何絕壁寒溪吼
風泉兩部樂松竹三益友
徐行欣有得芝朮在蓬蒿
西上九曲

亭衆山皆培塿却看江北路雲水渺何有離離見吳宮
莽莽見楚藪空傳孫郎石無復陶公柳爾來風流人惟
有漫浪叟買田吾已決乳水況宜酒所須脩竹林深處
安井臼相將踏勝絕更裹三日糗

武昌銅劍歌

并敘

供奉官鄭文嘗官於武昌江岸裂出古銅劍文得之以
遺余冶鑄精巧非鍛冶所成者

雨餘江清風卷沙雷公躡雲捕黃蛇蛇行空中如枉矢

電光煜煜燒蛇尾或投以塊鏗有聲雷飛上天蛇入水
水上青山如削鐵神物欲出山自裂細看兩脅生碧花
猶是西江老蛟血蘇子得之何所為蒯綬彈鋏詠新詩
君不見凌煙功臣長九尺腰間玉具高拄頤

定惠顯師為余竹下開嘯軒

啼鳩催天明喧喧相詆譙暗蛩泣夜永唧唧自相吊飲
風蟬至潔長吟不改調食土蚓無腸亦自終夕叫鳶貪
聲寂鄙鵲喜意可料皆緣不平鳴慟哭等嬉笑阮生已

粗率孫子亦未妙道人開此軒清坐默自照衝風振河
海不能號無竅累盡吾何言風來竹自嘯

石芝

并敘

元豐三年五月十一日癸酉夜夢游何人家開堂西門
有小園古井井上皆蒼石石上生紫藤如龍蛇枝葉如
赤箭主人言此石芝也余率爾折食一枝衆皆驚笑其
味如雞蘇而甘明日作此詩

空堂明月清且新幽人睡息來初勻了然非夢亦非覺

有人夜呼祁孔賓披衣相從到何許朱欄碧井開瓊戶
忽驚石上堆龍蛇玉芝紫筍生無數鏘然敲折青珊瑚
味如蜜藕和雞蘇主人相顧一撫掌滿堂坐客皆盧胡
亦知洞府嘲輕脫終勝嵇康羨王烈神仙一合五百年
風吹石髓堅如鐵

今年正月十四日與子由別於陳州五月子由
復至齊安未至以詩迎之

驚塵急雪滿貂裘淚洒東風別宛丘又向邯鄲枕中見

却來雲夢澤南州。睽離動作三年計。牽挽當為十日留。

早晚青山映黃髮。相看萬事一時休。

柳子厚別劉夢得詩云聖恩若許歸

田去黃髮相看萬事休

遷居臨臯亭

我生天地間。一蟻寄大磨。區區欲右行。不救風輪左。雖云走仁義。未免違寒餓。劍米有危炊。鍼氈無穩坐。豈無佳山水。借眼風雨過。歸田不待老。勇決凡幾箇。幸茲廢棄餘。疲馬解鞍馱。全家古江驛。絕境天為破。饑貧相乘。

除未見可弔賀澹然無憂樂苦語不成此

曉至巴河口迎子由

去年御史府舉動觸四壁幽幽百尺井仰天無一席隔
墻聞歌呼自恨計之失留詩不忍寫苦淚漬紙筆餘生
復何幸樂事有今日江流鏡面淨煙雨輕羃羃孤舟如
鳬鷺點破千頃碧聞君在磁湖欲見隔咫尺朝來好風
色旗尾西北擲行當中流見笑眼清光溢此邦疑可老
脩竹帶泉石欲買柯氏林茲謀待君必

與子由同游寒溪西山

散人出入無町畦朝游湖北暮淮西
高安酒官雖未上兩脚垂欲穿塵泥
與君聚散若雲雨共惜此日相提携
千搖萬兀到樊口一箭放溜先鳬鷺
層層草木暗西嶺瀏瀏霜雪鳴寒溪
空山古寺亦何有歸路萬頃青玻瓈
我今漂泊等鴻鴈江南江北無常栖
幅巾不擬過城市欲踏徑路開新蹊
路有直入寒溪
不過武昌者却憂別後不忍到見
子行迹空餘悽吾儕流落豈天意
自坐迂濶非人擠行

逢山水輒羞歎此去未免懃鹽齏何當一遇李八百相

哀白髮分刀圭

李八百宅
在筠州

次韻荅子由

平生弱羽寄衝風此去歸飛識所從好語似珠穿一一
妄心如膜退重重山僧有味寧知子瀧吏無言只笑儂
尚有讀書清淨業未容春睡敵千鍾

和何長官六言次韻

作邑君真伯厚去官我豈曼容一屨願託仁政六字難

賡變風

五噫已出東洛三復願比南容學道未從潘盎

南海謂狂為盎

潘近世得道者也

草書猶似楊風

楊凝式也

石渠何須反顧水驛幸足相容長江大欲見底探支八

月涼風

清風初號地籟明月自寫天容貧家何以娛客但知抹

月批風

青山自是絕色無人誰與為容說向市朝公子何殊馬

耳東風

觀張師正所蓄辰砂

將軍結髮戰蠻溪
篋有殊珍勝象犀
漫說玉牀分箭鏃
何曾金鼎識刀圭
近聞猛士收丹穴
欲助君王鑄褭蹄
多少空巖人不見
自隨初日吐虹霓

五禽言

并敘

梅聖俞嘗作四禽言
余謫黃州寓居定惠院
遶舍皆茂林脩竹
荒池蒲葦春夏之交
鳴鳥百族土人多以其聲

之似者名之遂用聖俞體作五禽言

使君向蘄州更唱蘄州鬼我不識使君寧知使君死人

生作鬼會不免使君已老知何晚

王元之自黃移蘄州聞啼鳥問其名或對

曰此名蘄州鬼元之大惡之果卒於蘄

南山昨夜雨西溪不可渡溪邊布穀兒勸我脫破袴不

辭脫袴溪水寒水中照見催租瘢

土人謂布穀為脫却破袴

去年麥不熟挾彈規我肉今年麥上場處處有殘粟豐

年無象何處尋聽取林間快活吟

此鳥聲云麥飯熟即快活

力作力作蠶絲一百箔壠上麥頭昂林間桑子落願儂

一箔千兩絲縑絲得蛹飼爾雛

此鳥聲云蠶絲一百箔

姑惡姑惡姑不惡妾命薄君不見東海孝婦死作三年

乾不如廣漢龐姑去却還

姑惡水鳥也俗云婦以姑虐死故其聲云

次韻子由病酒肺疾發

憶子少年時肺喘疲坐卧喊呀或終日勢若風雨過虛
陽作浮漲客冷仍下墮妻孥恐悵望膾炙不登坐終年
禁晚食半夜發清餓胃強鬲苦滿肺斂腹輒破三彭恣

啖齧二豎肯逋播寸田可治生誰勸耕黃稌

新法方田
謂上腴為

黃探懷得真藥不待君臣佐初如雪花積漸作櫻珠大
隔牆聞三嚙隱隱如轉磨自茲失故疾陽唱陰輒和神
仙多歷試中路或坎坷平生不盡器痛飲知無奈舊人
眼看盡老伴餘幾箇殘年一斗粟待子同春簸云何不
自珍醉病又一挫真源結梨棗世味等糠莖耕耘當待
穫願子勤自課相將賦遠遊仙語不用些

正月二十日往岐亭郡人潘古郭三人送余於

女王城東禪莊院

一本作代書寄桃山居士張聖可

十日春寒不出門，不知江柳已搖村。
稍聞決決流冰谷，盡放青青沒燒痕。
數畝荒園留我住，半瓶濁酒待君溫。
去年今日關山路，細雨梅花正斷魂。

鐵拄杖

并敘

柳真齡字安期，閩人也。家寶一鐵拄杖，如桺栗木牙節，宛轉天成，中空有簧，行輒微響。柳云：得之浙中，相傳王審知以遺錢鏐，鏐以賜一僧。柳偶得之，以遺余，作此詩。

謝之

柳公手中黑蛇滑千年老根生乳節忽聞鏗然爪甲聲
四坐驚顧知是鐵含簧腹中細泉語迸火石上飛星裂
公言此物老有神自昔閩王餉吳越不知流落幾人手
坐看變滅如春雪忽然贈我意安在兩脚未許甘衰歇
便尋輟迹訪崆峒徑渡洞庭探禹穴披榛覓藥採芝菌
刺虎鏃蛟螭蛇蝎會教化作兩錢錐歸來見公未華髮
問我鐵君無恙否取出摩挲向公說

與潘三失解後飲酒

千金弊帚人誰買半額蛾眉世所妍
顧我自為都眊騃憐君欲鬪小嬋娟
青雲豈易量他日黃菊猶應似去年
醉裏未知誰得喪滿江風月不論錢

東坡八首并敘

余至黃二年日以困匱故人馬正卿哀予乏食為於郡
中請故營地數十畝使得躬耕其中地既久荒為茨棘
瓦礫之場而歲又大旱墾闢之勞筋力殆盡釋耒而歎

乃作是詩自慰其勤庶幾來歲之入以忘其勞焉

廢壘無人顧頽垣滿蓬蒿誰能捐筋力歲晚不償勞獨
有孤旅人天窮無所逃端來拾瓦礫歲旱土不膏崎嶇
草棘中欲刮一寸毛喟然釋耒歎我廩何時高

荒田雖浪莽高庫各有適下隰種秔稌東原蒔棗栗江
南有蜀士桑果已許乞好竹不難栽但恐鞭橫逸仍須
卜佳處規以安我室家童燒枯草走報暗井出一飽未
敢期瓢飲已可必

自惜有微泉來從遠嶺背穿城過聚落流惡壯蓬艾去
為柯氏陂十畝魚蝦會歲旱泉亦竭枯萍粘破塊昨夜
南山雲雨到一聲外泣然尋故瀆知我理荒蕪泥芹有
宿根一寸嗟獨在雪芽何時動春鳩行可膾蜀人貴芹
芽膾雜鵝
之肉作

種稻清明前樂事我能數毛空暗春澤鍼水聞好語蜀人

以細雨為雨毛稻初生分秧及初夏漸喜風葉舉月明
時農夫相語稻鍼出矣

看露上一一珠垂縷秋來霜穗重顛倒相撐拄但聞哇

攏間蚱蜢如風雨

蜀中稻熟時蚱蜢羣飛田間如小蝗狀而不害稻

新春便入

甌玉粒照筐筥我久食官倉紅腐等泥土行當知此味
口腹吾已許

良農惜地力幸此十年荒桑柘未及成一麥庶可望投
種未逾月覆塊已蒼蒼農夫告我言勿使苗葉昌君欲
富餅餌要須縱牛羊再拜謝苦言得飽不敢忘

種棗期可剥種松期可斲事在十年外吾計亦已慙十
年何足道千載如風電舊聞李衡奴此策疑可學我有

同舍郎官居在瀟岳

李公擇也

遺我三寸柑照坐光卓犖百

栽儻可致當及春冰渥想見竹籬間青黃垂屋角

潘子久不調沽酒江南村郭生本將種賣藥西市垣古
生亦好事恐是押牙孫家有十畝竹無時客叩門我窮
交舊絕三子獨見存從我於東坡勞餉同一餐可憐杜
拾遺事與朱阮論吾師卜子夏四海皆弟昆

馬生本窮士從我二十年日夜望我貴求分買山錢我
今反累生借耕輟茲田刮毛龜背上何時得成羶可憐

馬生癡至今誇我賢衆笑終不悔施一當獲千

題織錦圖上回文三首

春晚落花餘碧草夜涼低月半枯桐人隨遠鴈邊城暮
雨映疎簾繡閣空

紅手素絲千字錦故人新曲九回腸風吹絮雪愁縈骨
淚洒縑書恨見郎

羞看一首回文錦錦似文君別恨深頭白自吟悲賦客
斷腸愁是斷絃琴

姪安節遠來夜坐三首

南來不覺歲崢嶸坐撥寒灰聽雨聲
遮眼文書元不讀
伴人燈火亦多情嗟予潦倒無歸日
今汝蹉跎已半生
免使韓公悲世事白頭還對短長檠

心衰面改瘦崢嶸相見惟應識舊聲
永夜思家在何處
殘年知汝遠來情畏人默坐成癡鈍
問舊驚呼半死生
夢斷酒醒山雨絕笑看饑鼠上燈檠

落第汝為中酒味吟詩我作忍饑聲
便思絕粒真無策

苦說歸田似不情腰下牛閑方解佩洲中奴長足為生
大弔一弛何緣彀已覺飜飜不受桯

冬至日贈安節

我生幾冬至小如昨日當時事父兄上壽拜脫膝十
年閱凋謝白髮催衰疾瞻前惟兄三顧後子由一近者
隔濤江遠者天一壁今朝復何幸見此萬里妹憶汝總
角時啼笑為梨栗今來能慷慨志氣堅鐵石諸孫行復
爾世事何時畢詩成却超然老淚不成滴

岐亭道上見梅花戲贈季常

蕙死蘭枯菊亦摧
返魂香入嶺頭梅
數枝殘綠風吹盡
一點芳心雀啁開
野店初嘗竹葉酒
江雲欲落豆稭灰
行當更向釵頭見
病起烏雲正作堆

樂全先生生日以鐵拄杖為壽二首

先生真是地行仙
住世因循五百年
每向銅人話疇昔
故教鐵杖鬪清堅
入懷冰雪生秋思
倚壁蛟龍護晝眠
遙想人天會
方丈衆中驚倒野狐禪

二年相伴影隨身踏遍江湖草木春
摘石舊痕猶作眼
閉門高節欲生鱗畏塗自衛真無敵
捷徑爭先却累人
遠寄知公不嫌重筆端猶自幹千鈞

杭州故人信至齊安

昨夜風月清夢到西湖上朝來聞好語扣戶得吳餉
輕圓白曬荔脆臘紅螺醬更將西庵茶勸我洗江瘴
故人情義重說我必西向一年兩僕夫千里問無恙
相期結書社

故人相約贖錢雇僕未一歲再至黃未怕供詩帳

僕頃以詩得罪有司移杭取境內所

留詩杭州供數
百首謂之詩帳

還將夢魂去一夜到江漲

江漲杭州橋名

送牛尾狸與徐使君

時大雪中

風捲飛花自入帷一樽遙想破愁眉
泥深厭聽雞頭鶻

蜀人謂泥滑為雞頭鶻

酒淺欣嘗牛尾狸
通印子魚猶帶骨披綿

黃雀漫多脂慙勤送去煩纖手
為我磨刀削玉肌

四時詞

春雲陰陰雪欲落東風和冷驚羅幕
漸看遠水綠生漪
未放小桃紅入萼佳人瘦盡雪膚肌
眉斂春愁知為誰

深院無人剪刀響應將白紵作春衣

垂柳陰陰日初永
蔗漿酪粉金盤冷
簾額低垂紫燕忙
蜜脾已滿黃蜂靜
高樓睡起翠眉顰
枕破斜紅未肯勻
玉腕半揎雲碧袖
樓前知有斷腸人

新愁舊恨眉生綠
粉汗餘香在蘄竹
象牀素手熨寒衣
爍爍風燈動華屋
夜香燒罷掩重扃
香霧空濛月滿庭
抱琴轉軸無人見
門外空聞裂帛聲

霜葉蕭蕭鳴屋角
黃昏斗覺羅衾薄
夜風搖動鎮幃屏

酒醒夢回聞雪落起來呵手畫雙鴉醉臉輕勻襯眼霞
真態生香誰畫得玉奴纖手嗅梅花

太守徐君猷通守孟亨之皆不飲酒以詩戲之
云

孟嘉嗜酒桓溫笑徐邈狂言孟德疑公獨未知其趣爾
臣今時復一中之風流自有高人識通介寧隨薄俗移
二子有靈應撫掌吾孫還有獨醒時

雪後到乾明寺遂宿

門外山光馬亦驚
塔前屐齒我先行
風花誤入長春苑
雪月長臨不夜城
未許牛羊傷至潔
且看鴉鵲弄新晴
更須攜被留僧榻
待聽摧簷瀉竹聲

伯父送先人下第歸蜀詩云人稀野店休安枕
路入靈關穩跨驢
安節將去為誦此句因以
為韻作小詩十四首送之

索漠齊安郡從來著放臣
如何風雪裏更送獨歸人
瘦骨寒將斷衰髯摘更稀
未甘為死別猶恐得生歸

日上氣暎江雪晴光眩野記取到家時鋤耰吾正把
月明穿破裘霜雪澁孤劍歸來閉戶坐默數來時店
諸兄無可寄一語會須酌晚歲俱黃髮相看萬事休
故人如念我為說瘦樂樂尚有身為患已無心可安
吾兄喜酒人今汝亦能飲一杯歸誦此萬事邯鄲枕
東阡在何許寒食江頭路哀哉魏城君宿草荒新墓
臨分亦泣然不為窮途泣東阡時一到莫遣牛羊入
我夢隨汝去東阡松柏青却入西州門永愧北山靈

乞墻何足羨負米可忘艱莫為無車馬含羞入劔關
我坐名過實謹諱自招損汝幸無人知莫厭家山穩
竹筍與練裙隨時畢婚嫁無事若相思征鞍還一跨
萬里却來日一庵仍獨居應笑謀生拙團團如磨驢

和王鞏六首並次韻

君談陽朔山不作一錢直巖藏兩頭虺瘴落千仞翼雅
宜驩悅放頗訝虞舜陟覽來已可畏覽鏡憂面黑況予
三年囚苦霧變飲食吉人終不死仰荷天地德我來黃

岡下欹枕江流碧江南武昌山向我如咫尺春蔬黃土
軟凍筍蒼崖拆此行我累君乃反得安宅遙知丹穴近
為斲岫嶠石他年分刀圭名字挂仙籍

君許惠桂
州丹砂

少年帶刀劒但識從軍樂老大服犁鋤解佩付鎔鑠雖
無獻捷功會賜力田爵敲冰春擣紙刈葦秋織箔櫟林
斬冬炭竹塢收夏籜四時俯有取一飽天所酢君生統
綺間欲學非其脚左右玉纖纖束薪誰為縛勿令聞此
語翠黛頰將惡笑我一間茆婦姑紛六鑿

欲結千年實先摧二月花故教窮到骨要使壽無涯久

已逃天網何須服日華賓州在何處為子上栖霞樓

名

鄰里有異趣何妨傾蓋新殊方君莫厭數面自成親默
坐無餘事回光照此身他年赤墀下玉立看垂紳

平生我亦輕餘子晚歲人誰念此翁巧語屢曾遭薏苡
度詞聊復託芎藭子還可責同元亮妻却差賢勝敬通
若問我貧天所賦不因遷謫始囊空

君家玉臂貫銅青下客何時見目成勤把鉛黃記宮樣

莫教絃管作蠻聲薰衣漸歎衙香少擁髻遙憐夜語清
記取北歸攜過我南江風浪雪山傾

君自南江赴任不一過我

記夢回文二首并敘

十二月二十五日大雪始晴夢人以雪水煮小團茶使
美人歌以飲余夢中為作回文詩覺而記其一句云亂
點餘花唾碧衫意用飛燕唾花故事也乃續之為二絕
句云

醺顏玉盃捧纖纖亂點餘花唾碧衫歌咽水雲凝靜院

夢驚松雪落空巖

空花落盡酒傾缸
日出山融雪漲江
紅焙淺甌新火活
龍團小碾鬪晴窓

三朵花

并敘

房州通判許安世以書遺余言吾州有異人常戴三朵花
莫知其姓名郡人因以三朵花名之能作詩皆神仙
意又能自寫真人有得之者許欲以一本見惠乃為作
此詩

學道無成鬢已華，不勞千劫漫烝砂。
歸來且看一宿覺，未暇遠尋三朶花。
兩手欲遮餅裏雀，四條深怕井中蛇。
畫圖要識先生面，試問房陵好事家。

次韻陳四雪中賞梅

臘酒詩催熟寒梅，雪鬪新杜陵休歎。
老韋曲已先春獨秀，驚凡目遺英卧逸民。
高歌對三白遲莫，慰安仁。

正月二十日與潘郭二生出郊尋春，忽記去年
是日同至女王城作詩，乃和前韻。

東風未肯入東門走馬還尋去歲村人似秋鴻來有信
事如春夢了無痕江城白酒三杯釀野老蒼顏一笑溫
已約年年為此會故人不用賦招魂

是日偶至野人汪氏之居有神降於其室自稱
天人李全字德通善篆字用筆奇妙而字不
可識云天篆也與予言有所會者復作一篇
仍用前韻

酒渴思茶漫扣門那知竹裏是仙村已聞龜策通神語

更看龍蛇落筆痕色瘁形枯應笑屈道存目擊豈非溫
歸來獨掃空齋卧猶恐微言入夢魂

浚井

古井沒荒萊不食誰為惻餅罌下兩綆蛙蚓飛百尺腥
風被泥滓空響聞點滴上除青青芹下洗鑿鑿石沾濡
愧童僕盃酒暖寒栗白水漸泓渟青天落寒碧云何失
舊穢底處來新潔井在無有中無來亦無失

紅梅三首

怕愁貪睡獨開遲，自恐冰容不入時。故作小紅桃杏色，
尚餘孤瘦雪霜姿。寒心未肯隨春態，酒暈無端上玉肌。
詩老不知梅格在，更看綠葉與青枝。

石曼卿紅梅詩云
認桃無綠葉辨杏

有青
枝

雪裏開花却是遲，何如獨占上春時。也知造物含深意，
故與施朱發妙姿。細雨裊殘千顆淚，輕寒瘦損一分肌。
不應便雜夭桃杏，半點微酸已著枝。

幽人自恨探春遲，不見檀心未吐時。丹鼎奪胎那是寶，

朱砂紅銀謂玉人頰頰更多姿抱叢暗蕊初含子落盡
之不奪胎色
穠香已透肌乞與徐熙新畫樣竹間璀璨出斜枝

和子由寄題孔平仲草庵次韻

逢人欲覓安心法到處先為問道庵
廬子不須從若士
蓋公當自過曹參羨君美玉經三火笑我枯桑困八蠶
猶喜大江同一味故應千里共清甘

二蟲

君不見水馬兒步步逆流水大江東流日千里此蟲趨

趨長在此君不見鷄濫堆決起隨衝風隨風一去宿何
許逆風還落蓬蒿中二蟲愚智俱莫測江邊一笑無人
識

陳季常見過三首

仕宦常畏人退居還喜客君來輒館我未覺雞黍窄東
坡有奇事已種十畝麥但得君眼青不辭奴飯白
送君四十里只使一帆風江邊千樹柳落我酒盃中此
行非遠別此樂固無窮但願長如此來往一生同

聞君開龜軒東檻俯喬木人言君畏事欲作龜頭縮我
知君不然朝飯仰賜谷餘光幸分我不死安可獨

寒食雨二首

自我來黃州已過三寒食年年欲惜春春去不容惜今
年又苦雨兩月秋蕭瑟卧聞海棠花泥汙胭脂雪暗中
偷負去夜半真有力何殊病少年病起頭已白

春江欲入户雨勢來不已小屋如漁舟濛濛水雲裏空
庖煮寒菜破竈燒濕葦那知是寒食但見烏銜紙君門

深九重墳墓在萬里也擬哭塗窮死灰吹不起

徐使君分新火

臨臯亭中一危坐三見清明改新火溝中枯木應笑人
鑽斫不然誰似我黃州使君憐久病分我五更紅一朶
從來破釜躍江魚只有清詩嘲飯顆起攜蠟炬遶空屋
欲事烹煎無一可為公分作無盡燈照破十方昏暗鑠
次韻荅元素余舊有贈元素云天涯同是傷流
落元素以為今日之先兆且悲當時六客之

存亡六客蓋張子野劉孝叔陳令舉李公擇
及元素與余也

不愁春盡絮隨風但喜丹砂入頰紅
流落天涯先有識
摩挲金狄會當同
蘧蘧未必都非夢
了了方知不落空
莫把存亡悲六客
已將地獄等天宮

東坡全集卷十二

謹案卷十一第六頁前四行三句已過黃梅雨刊

本黃梅訛梅黃據施本改

第九頁後六行同甲惟君尚黑頭刊本惟訛怪據
施本改


第二十八頁前二行笑問伯松何苦心刊本伯訛
栢據施本及漢書改

卷十二第十頁前七行農夫相語稻鍼出矣刊本
出訛水據施本改

第二十頁前七行并在無有中按施本無有作有

無





總校官庶吉士臣張能照

校對官編修臣朱攸

謄錄監生臣張君紱